

**“NO TIN MOTIBO PA
PERDE MAS AUTONOMIA
FINANCIERO” –
PARLAMENTARIO XIOMARA
MADURO**



WWW.SOLODIPUEBLO.COM



SOLODIPUEBLO@GMAIL.COM

**UN BERGUENSA DI
GOBIERNO
MIKE, GEOFFREY Y
GERLIEN A BENDE NOS
STATUS APARTE TRAS
DI PORTA SERA**



**TRUMP A PIDI AUSTRALIA
PA DUNA ASILO NA
FUTBOLISTANAN DI IRAN:
“PROBABLEMENTE NAN LO
WORDO ASESINA”**



**TRABOU DI MANTENCION RIBA LIÑA
DI DISTRIBUCION SANTA CRUZ**
Interupcion di Coriente Planea

En conexon cu trabounan necesario pa mantene
un suministro di coriente confiabel,
e servicio di coriente lo wordo interumpi:

**Diahuebs, 12 di maart 2026
8:30 AM te cu 4:00 PM**

Den vecindario di:

- Jucuri (un parti)
- Mahuma (un parti)
- Papilon (un parti)
- Sabana Grandi (un parti)
- Sero Teishi

N.V. ELMAR ta pidi disculpa pa e inconveniencia cu
e interupcion di coriente aki por causa.

Bishita **www.elmar.aw** pa mira e lista di adresnan afecta.

Danki pa e comprension.



ELMAR

DIA INTERNACIONAL DI HENDE MUHE

NO PAGA LUS DI UN OTRO ,

PADI BO BRIYA MAS



ORANJESTAD - Diasabra awor, 8 maart, ta Dia Internacional di Hende Muhe. Pami e dia aki ta un dia di refleccion, di compromiso y di celebracion. Un dia di refleccion riba e papel importante cu hende muhenan ta desplegando na Aruba. Como hende muhe nos ta trece otro

cualidadnan na mesa.

Nos ta usualmente mas empatico, nos ta dirigi nos mes mas na busca solucion, y mayoria di nos no ta permiti 'ego' hunga un rol. Mi ta convenci cu si nos tabata tin mas lidernan femenino, lo tin menos guerra na mundo.

New York Times a publica un articulo na november 2018 titula "Aruba: where women lead". Den e entrevista cu New York times, mi a trece padilanti cu liderasgo femenino ta sigur un di e factornan cu ta determinando e exito di Aruba. Na Aruba tin relativamente hopi lider femenino ta dirigi diferente organisacionnan y institutonnan.

Pero nos sa tambe, cu no ta tur hende muhe ta haya oportunidad of trato igual manera hende homber. Pesey dia 8 di maart ta un dia importante pa nos reconfirma nos compromiso pa percura cu nos hende muhe y nos mucha muhenan haya trato igual, y oportunidadnan igual.

Aparte di esaki, dia 8 di maart mester ta un dia tambe di celebracion. Un dia pa celebra nos exitonan como hende muhe. Y aki

na Aruba tin hopi ehempel di exitonan cu nos por ta hopi orguyoso di nan.

Un cos si, tur e avancen aki, no a bin dimes, y nos no mester lag'e na casualidad y kere cu hende muhenan den futuro lo tin tur e oportunidadnan dimes. Si nos kier pa nos yiu muhenan, nan yiu muhenan y tur mucha muhe tin oportunidad igual real den liderasgo den nos pais, nos mester tuma pasonan conciente di awor caba, pa prepara e siguiente generacion.

Actualmente tin hopi hende muhe den posicion di liderasgo na Aruba. Nos no a logra e posicionnan aki facilmente, algun di nos mester a lucha duro, mester a kibra plafonnan di glas, pa yega te na top. Pero e dia lo yega cu nos mester subi e lift pa baha bek. Si di berdad nos ta kere

den liderasgo femenino, nos mester percura pa e momento cu nos baha for di e lift ey, tin filanan largo di hende muhe pa subi e lift pa bai na top. Pesey nos mester prepara e siguiente generacion di hende muhe pa lidera nos pais.

Y finalmente, mi kier duna un consejo. Nos cada un tin nos luz cu ta briya desde nos interior. No paga luz di otronan, keriendo cu di bo lo briya mas. Tin suficiente luga den henter universo pa nos tur briya nos luz, y pa yuda esnan cu mester di mas claridad.

Mi ta convenci cu pa un miho Aruba, nos mester mas lidernan femenino. Mi ta sumamente orguyoso di por tabata e prome hende muhe den ocupa e posicion di Minister President, y mi lo percura pa mi no ta e ultimo.



HALA ROSEA LIBREMENTE

Cu introduccion di e ley aki DVG y Gobierno ta trata na reduci e risico pa malesanan cronico cu es cu ta huma por desaroya, como tambe proteha e 'second-hand smoker' y preveni e hoben di cuminsa huma na un edad jong.







ANUNCIO/BLBA/010/26

Mediador di Gobierno na Aruba ta anuncia a base di articulo 1 inciso 2 di "Arbeidsvredebesluit 111" cu a ricibi e siguiente peticion, pa tene un Referendum bao di e empleadonan di e empresa menciona aki bao:

Number peticionario: "Sindicato di Trahadornan di Aruba (STA)"
 Number EMPRESA: "Aruba Airport Authority N.V."

Ta pone atencion riba e posibilidad pa sindicatonan interesa, dentro di **14 dia** despues di e fecha di e anuncia aki, trece nan deseo pa participa na dicho Referendum na conocimiento di Mediador.

Aruba 6 maart 2026
 wnd Mediador di Gobierno
 Mireille Meeuwisse

TRUMP A PIDI AUSTRALIA PA DUNA ASILO NA FUTBOLISTANAN DI IRAN: “PROBABLEMENTE NAN LO WORDO ASESINA”

Den un movcion cu a hala atencion mundial, President Donald Trump a haci un yamada fuerte na e Gobierno di Australia pa duna asilo politico na e hungadonan di e seleccion femenino di futbol di Iran.

Segun Trump, e hungadonan aki ta core un riesgo mortal si nan bolbe nan pais, despues cu nan a protesta silenciosamente door di no canta e himno nacional durante nan participacion den e Copa di Asia na Australia.

E Situacion na Australia

E seleccion femenino di Iran a causa un polemica grandi ora nan a keda sin canta nan himno nacional den nan prome wega contra Sur Korea.

E acto aki a wordo mira pa e

regimen di Teheran como “traicion den tempo di guerra”. Maske cu den e weganan posterior nan a canta e himno (bou de presion y vigilancia di oficialnan di seguridad), activistanan di derechonan humano y awo e mandatario Mericano ta kere cu nan bida ta na peliger.

Trump a declara riba su plataforma Truth Social: “Australia ta cometiendo un eror humanitario teribel... mi ta pidi e Prome Minister: duna nan ASILO. Merca lo tuma nan si boso no kier.”

E situacion aki ta pone Australia den un posicion diplomatico complica, mesclando e pasion di deporte cu e tensionnan geopolitico mas halto di e momento actual.



MEP TA ORGANISA CHARLA RIBA STATUS APARTE

ORANJESTAD - Movimiento Electoral di Pueblo (MEP) ta organisa un charla titula “Status Aparte” como parti di e conmemoracion di 40 aña di Status Aparte di Aruba.

E charla lo tin como orador principal Xiomara Maduro, miembro di partido y parlamentario di fraccion di MEP den Parlamento. Durante su presentacion, e lo repasa e lucha historico pa auto determinacion di Aruba y e pasonan importante cu a hiba nos pais na Status Aparte.

Ademas, lider honorario di MEP, Nel Oduber, lo participa como invitado special, unda e lo comparti su experiencia personal y relata e hechonan manera nan a sosode durante e periodo decisivo di e lucha politico pa Status Aparte.

E actividad lo tuma luga dia 12 di maart 2026, di 7:00 PM te 9:00 PM, na Cede di MEP.

MEP ta invita tur hende interesa pa asisti y participa den e reflexion riba un momento historico importante den e desaroyo constitucional di Aruba.

CHARLA STATUS APARTE



Xiomara Maduro
Orador



Nel Oduber
Invitado Special



Ora: 7 PM - 9 PM | Dia: 12 di Maart 2026

LUGA: CEDE DIMEP



Parlamentario Danguí Oduber:

RIJKSWET HOFA LO DESTROI NOS STATUS APARTE!

Den fin di siman un biaha mas gobierno di Aruba a falta respet pa democracia, falta respet pa Parlamento di Aruba, falta respet pa sindicatonan y falta respet pa pueblo di Aruba. Manera un ladron di anochi gobierno di Aruba a manda 3 siman pasa caba e ley di reino Hofa Hulanda pa asina trata y aproba esaki den conseho di minister di reino diabierna ultimo. Gobierno di Aruba a haci esaki sin informa Parlamento, sin informa tur e sindicatonan cu ta na mesa cu nan den dialogo social y sin informa pueblo.

Gobierno ta sconde informacion

Ora gobierno sende un luz na un rotonde nan ta bai live y haci yen di drama pero un tema asina delicado y sensitivo manera entrega di nos Libertad y entrega di nos Status Aparte nan no tin e decencia pa informa pueblo. Esaki ta un gobierno cu NO kier duna pueblo informacion, no kier ta transparente y ta haci cosnan scondi pasobra nan sa cu NO tin sosten den pueblo pa entrega nos Status Aparte.

Aruba NO kier un rijkswet! Den parlamento ya caba 10 di e 21 miembronan ta contra e rijkswet, 13 sindicato cu ta representa miles di miembro tampoco kier e rijkswet y mas di 10.000 persona a

firma e peticion contra e rijkswet. E ta obvio cu NOS NO POR PAPIA CU TIN CONSENSUS!

Cuchiu den lomba di pueblo

Gobierno no kier respeta deseo di pueblo y pa un sakito di placa ta bay destrui nos Status Aparte. Con gobierno kier nos celebra 40 año di Status Aparte anto despues di 40 año nan mes ta kita esaki for di boso? No tin otro palabra pa esaki cu no ta: TRAICION!

CAFT a caba di duna su conseho riba presupuesto 2026. Den e conseho CAFT ta señala cu e debe di pais Aruba (e debt to GDP) ta baha bao di 50% y yega na 47% na año 2028. Desde comienso ora a cuminsa e discusion riba rijkswet, e condicion di gobierno di Hulanda tawata cu mester un finanzas sostenibel y duradero e debe di pais Aruba lo mester ta bao di 50%. Wel, Aruba a demostra cu nos mes por y ya aki 2 año nos debe ta baha bao di e 50% aki. E ora naturalmente nos mester puntra nos mes kico ta e urgencia y necesidad pa entrega nos autonomia financiero ainda si nos a demostra cu nos mes por?

Con nan por papia di Amor pa Aruba?

Ta insolito pa pensa cu tin politiconan Arubiano manera Gerlien Croes, Geoffrey Wever y



Mike Eman cu kier pa nos celebra cu nos ta biba riba un pais liber anto kier entrega nos libertad y bende nos pais pa un sakito di placa. Ta mas insolito pa pensa cu nan kier entrega nos finanzas publico, nos autonomia financiero siendo cu aki 2 año caba nos debe di pais a baha bao di 50%!

Aruba tin supervision financiero ancra den e landsverordening Aruba financieel toezicht, Aruba ta cumpliendo cu tur e normanan, Aruba ta pagando su debenan cu Hulanda y ja caba nos debe a baha cu 50% despues di e pandemia. Bisando esaki no tin ningun motibo valido y ningun

hustificacion pa acepta e rijkswet Hofa.

Libertad di un pais ta algo Sagrado

Nos ta un pais liber desde año 1986 y danki na e libertad aki nos pais por a prospera y progresa. Nos tin awor E Libertad pa tuma nos propio decisionan, e Libertad pa vota den nos parlamento, e Libertad pa usa nos fondonan manera nos ta desea y tur esaki ta wordo kita for di nos cu Rijkswet Hofa. E pregunta principal ta keda, dicon gobierno kier destrui nos Status Aparte?

TUMA ACCION PA PREVENI, PROTEHA Y STOP DENGUE CON NOS POR STOP DENGUE?



Parlamentario Endy Croes: UN BERGUENSA DI GOBIERNO MIKE, GEOFFREY Y GERLIEN A BENDE NOS STATUS APARTE TRAS DI PORTA SERA

ORANJESTAD – Diabierna 6 di maart 2026 ta keda marca como un otro "diabierna scur" den historia di nos pais. Den un acto di tracion total, e ministernan Mike Eman, Geoffrey Wever y Gerlien Croes a bolbe dal Aruba un hinca den lomba, entregando nos autonomia y nos Status Aparte na Hulanda sin consulta cu ningun hende.

Maneho di "ladron den anochi"

Endy Croes a recorda pueblo cu e wega sushi aki a cuminsa for di 29 di augustus 2025. Mescos cu ladron den anochi, e ministernan aki a bini Parlamento pa avisa cu e Ley di HOFA a wordo trata na Hulanda. "Con por tin hende asina entreguista y sin escrupulo?" Croes a cuestiona. "MEP no a permiti e cos aki! Nos a

move shelo y tera, a reuni cu gremionan y a duna mas di 10 mil persona un bos pa expresa nan desgusto cu HOFA."

Gobierno a ignora Sindicato y Expertonan Maske 13 sindicato a manda carta splica pakico nan ta contra HOFA, y maske e Profesor Elzinga a duna advies cu e ley aki ta contra nos Constitucion, e gobierno di AVP-Futuro a dicidi di sigui "pusha" tras di cortina.

- Marlon Sneek ta nenga di yama reunion cu sindicatonan cu ta representa bo.

- AVP y Futuro a hunga un wega sushi contra bo, nan no ta respeta bo opinion.

- Traicion: Nan a bolbe bay di acuerdo pa pone HOFA riba agenda di Rijkswinsterraad diabierna ultimo sin bini

Parlamento.

Milly Schwengle tambe a carga e corona di tracion

Pa completa e plan macabro aki, nan a core huramenta Milly Schwengle como Minister Plenipotenciario (GevMin) y a "post" e mesun dia pa Hulanda pa e bay representa e traicion aki den e reunion di 6 di maart. "Milly ta un persona cu sa mihor. E sa kico mi kiermen tambe cu esaki! Awor e tambe ta politico y nos lo adreseer su persona debidamente. Ta lamentabel cu e ta permiti su mes carga e corona di traicion hunto cu Mike y e restonan," Endy a expresa indigna.

"Tempo di colonialismo a pasa!"

Parlamentario Croes a manda un aviso cla pa e "ministernan astuto" cu



kier colonisa Aruba atrobe: MEP no ta doblega! "Tempo di colonialismo a pasa hopi aña caba. Nos lo bringa HOFA cu alma y cuerpo. Nos no ta permiti pa un Parlamento desfuncional sin ningun punta di respet pa pueblo secuestra un pais su derecho di autodeterminacion."

Bo amigo pa semper ta

cla pa e lucha!

"Mi ta pidi tur nos militancia pa ta atento. Siman entrante nos ta bolbe sinta cu e sindicatonan. Mi compromiso ta cu e bandera di Aruba. Nos no ta duna niun stap patras! Ta momento pa gara nos bandera y lucha te na final contra e traidornan aki. iAruba ta di nos!"

COA - DIA INTERNACIONAL DI HENDE MUHER 2026



"Nan a duna nan forza pa construí e caminda; e generacion nobo ta gana e forza pa core riba dje."

Felís Dia Internacional di hende Muher na tur e muhernan fuerte cu a traha e caminda, na tur esnan cu awor ta scirbi historia y na esnan cu ta bini dilanti pa briya!



Fraccion di MEP:

TRANSPARENCIA NO TA UN OPCION, E TA UN DEBER PA CU PUEBLO!



ORANJESTAD – Cu un record impecabel di accion den Parlamento, Fraccion di MEP ta demostra cu nan rol di control no ta keda den palabra so. Den e cuadro di integridad y bon gobernacion, e fraccion awor ta considerando e instrumento di control mas fuerte cu ley ta brinda: un Encuesta Parlamentario

pa yega na e berdad den e caso di Minister Gerlien Croes.

Diaranson ultimo, Parlamento a trata un ley di iniciativa di e parlamentarionan Edgard Vrolijk y Rocco Tjon. Cu esaki, Vrolijk ta marca su di 9 ley di iniciativa y Tjon su di 5. E cifranan aki ta

papia pa nan mes: MEP ta tuma su responsabilidad cu e comunidad hopi serio, dunando contenido real na e derecho di iniciativa (initiatiefrecht).

Integridad ta e fundeshi

Pa e Fraccion di MEP, integridad no ta un concepto bashi, sino e

fundeshi di confiansa entre un gobernante y su pueblo. Ora un Minister ta wordo cuestiona riba su actonan, manera e biahe den un jet priva, e unico contesta aceptabel ta e berdad absoluto y transparente.

Lider di Fraccion, Evelyn Wever-Croes, a splica cu MEP ta cla pa e siguiente paso den nomber di e bienestar di Aruba. “Nos ta considerando seriamente pa inicia un Encuesta Parlamentario. Esaki ta un instrumento fuerte di control pasobra pueblo tin e derecho sagrado di sa kico ta e berdad. Te awe, Minister Gerlien Croes no a duna un contesta cla ni transparente. Ora un Minister faya den su deber di duna cuenta, Parlamento mester actua

pa restaura e respet pa nos institucionnan.”

Honestidad sin condicion

E meta di MEP ta claridad total. Den un democracia saludabel, transparencia no ta un favor cu un Minister ta haci, sino un obligacion legal y moral.

“Nos lo uza tur medio legal na nos alcanse pa haya e berdad. Pueblo di Aruba ta merece gobernantenan cu ta actua cu honestidad y cu no ta sconde tras di tecnicismo. Transparencia no ta un opcion, e ta nos deber principal pa cu e pueblo cu nos ta sirbi,” Evelyn Wever-Croes a finalisa bisando.

“DANKI MIKE, NOS PLACA TA YEGA AWO SI”

Pensionado ta expresa gratitud pa aumento ricibi

Durante e recorrido di Accion di Bario, iniciativa di Prome Minister Mike Eman pa mantene contacto directo cu comunidad ta bon ricibi. Hopi ciudadano ta comparti nan historia personal y reaccion riba diferente maneho di gobierno.

Un pensionado cu a topa cu Prome Minister, a relata cu durante hopi aña su pensioen apenas tabata alcanza pa cubri

gastonan basico manera awa, coriente y otro necesidadnan diario. E aumentonan di pensioen recientemente a trece un alivio importante den su situacion.

“E segundo aumento di pensioen a yuda hopi. Awor por cumpra un tiki mas cos,” a comenta cu aprecio.

Tambe nan a expresa nan gradicimento na Prome Minister Mike Eman, señalando cu e

aumento aki ta representa un promesa cumpli pa hopi adulto mayor cu ta depende di nan pensioen pa nan sustento nan mes.

Durante Accion di Bario, reaccionnan manera esaki ta scucha frecuentemente, caminda hopi pensionado ta muestra nan aprecio pa e aumento di pensioen y pa e oportunidad pa comparti nan preocupacionnan directamente cu gobierno.



Parlamentario Hendrik Tevreden: HOFA: UN PASO ATRAS NET DEN UN AÑA DI ORGUYO NACIONAL

ORANJESTAD – Den un año unda Aruba ta prepara pa celebra 40 año di Status Aparte y 50 año di Himno y Bandera, e discusion riba Rijkswet HOFA ta muestra un contraste profundo. Na momento cu nos pueblo ta conmemora autonomia, identidad y orguyo nacional, gobierno ta presenta un ley cu hopi hende ta mira como un paso atras pa nos autonomia politico y financiero.

Parlamento a wordo by-passed

Gobierno ta presenta HOFA manera un resultado natural di un acuerdo cu Hulanda. Pero realidad ta mas preocupante: Parlamento, e organo mas halto cu ta representa e pueblo di Aruba, a keda na banda di e proceso.

Den nos systema constitucional, e proseso mester ta: prome duna espacio pa Parlamento discuti esaki, despues gobierno actua den e marco cu Parlamento ta dune. Pero den e caso aki, gobierno a compromete su mes cu Hulanda prome, y despues a bin cu Parlamento pa ratifica loke ya a wordo negosha. Esaki ta manda un señal peligroso: cu fraccion AVP y Futuro den Parlamento ta un simpel stempel pa decisionnan cu ministernan ta tuma.

Bestuurlijk akkoord no ta ley

Gobierno y hasta algun Parlamentario ta referi constantemente na e Bestuurlijk Akkoord di juni 2024 como base pa HOFA. Pero un firma di un premier – especialmente un ex-premier – no por reemplasa mandato di e pueblo.

Un acuerdo politico no ta ley, ni riba ley. Esaki propio miembronan

di Eerste Kamer a splica publicamente y profesornan di ley tambe. Solamente Parlamento, como representante di pueblo, tin poder pa determina si un Rijkswet ta hustifica, necesario y aceptabel pa Aruba.

Niun acuerdo entre Gobiernonan por obliga un Parlamento pa vota “pro”.

Un number nobo, pero mesun presion

Na april 2024, RAft a wordo kita for di mesa. Hopi ciudadano a sinti alivio, pasobra e proyecto tabata percibi como un forma di supervision directo di Den Haag riba nos finanzas.

Awor HOFA ta bin cu un number nobo, pero hopi di e preocupacionnan ta mescos. E discusion ta bolbe riba supervision structural di Hulanda riba politica financiero di Aruba. Dies cu awor tin como e gancho, interes mas abou. Of mihor bisa, e saco di placa.

Den un año cu nos ta celebra nos autonomia, e pregunta fundamental ta:

Nos ta fortalece nos autonomia, of nos ta debilita esaki?

E riesgo di HOFA

Tin varios punto di preocupacion:

- Institucional: Parlamento ta wordo reduci na un rol secundario, lo cual debilita e balance di Trias Politica.
- Politico: Gobiernonan lo tin un espacio limita pa por tuma decision den e marco nobo di ley di Reino.
- Democratico: Pueblo no a wordo involucra suficiente den e discusion, mirando cu Parlamento a haya e documento despues cu e acuerdo politico ya tabata firma



pa minister Eman y minister Geoffrey.

- Huridico: Un consensusrijkswet solamente por existi cu aprobacion di Parlamento. Sin e aprobacion aki, no tin consenso.

Un momento di reflexion nacional E discusion riba HOFA ta bay mas aya di un tema tecnico di finansa o interes abou.

Den un año di simbolismo historico, 40 año di Status Aparte y 50 año di Himno y Bandera, Aruba ta enfrenta un pregunta importante: con firme nos ta bay para pa proteha e autonomia cu e generacionnan prome cu nos a lucha pa logra?

Parlamento tin un responsabilidad directo cu e pueblo. E no ta

responde na presion di acuerdo entre gobierno, sino na e mandato democratico di nos ciudadanonan. ‘Si un ley ta debilita rol di Parlamento y autonomia di Aruba, e respuesta mester ta un “no” firme’, Tevreden a declara.



Shailiny Tromp-Lee:

INDIGNACION TOTAL: GOBIERNO TA DEBILITA NOS DEMOCRACIA Y TA IGNORA PUEBLO DEN E PROCESO DI RIJKSWET HOFA

ORANJESTAD - Cu un sentimiento di rabia profundo y indignacion absoluto, mi mester enfatisa un biaha mas cu mi ta contra e forma dictatorial cu Gobierno di Aruba ta manehando e proceso di Rijkswet HOFA. Mi ta condena e manera scondi cu Gobierno ta trata e topico aki, sin brinda claridad y sin responsabilisacion.

Ta keda confirma, un biaha mas, cu transparencia pa e Gobierno akita un concepto inexistente y cu e respet pa nos institucionnan democratico ta wordo trapa.

Esaki no ta djis un fayto administrativo, esaki ta un atake directo riba nos autonomia y riba e representacion di pueblo.

Sin decensia y sin transparencia

Un gobierno arogante cu un biaha mas no tabatin e decensia basico pa informa Parlamento cu e asina yama 'internetconsultatie' a finalisa y cu nan a dicidi di sigui cu e proceso. Structuralmente nan ta faya pa brinda transparencia na Parlamento y pueblo henter. Bo lo puntra bo mes:

- Unda e respet pa Parlamento ta?
- Unda e respet pa e sindicatonan ta?
- Unda e oido pa e mas cu 10 mil firmantena

cu a para firme contra e ley aki a keda?


Gobierno a opta pa keda keto, scondiendo informacion vital y ignorando completamente e preocupacionnan serio cu stakeholders a presenta. No tin ningun claridad si a tene cuenta cu ni un solo punto di critica, loke ta duna e impresion cu e consulta tabata un puro "show" pa cumpli formalmente.

Un Violacion di nos Constitucion y Palabracionnan

Loke ta mas alarmante ta e echo cu e Rijkswet HOFA aki ta bay directamente contra nos Constitucion. Gobierno a scohe pa mishi cu e fundeshi di nos estado di derecho pa complace interesnan externo, sin tin e consensus necesario.

Banda di esaki e proceso cu Gobierno ta encaminando ta un violacion concreto contra palabracionnan haci durante IPKO y consehonan di Raad van State.

Mas pio ainda ta e echo cu desde un principio Gobierno ta actuando sin Autorisacion: Gobierno a bay di acuerdo cu e concepto aki sin presenta esaki debidamente na Parlamento prome. Nan a bende nos autonomia sin cu e representantenan di pueblo por a bisa "A" of "B".



o Informacion, o Responsabilidad

Nos ta biba bou di un maneho cu a faya structuralmente den su deber di brinda transparencia. E falta di informacion na pueblo di Aruba ta hunga un rol di "blackout" informativo consciente. Ta parse cu e meta principal di e Gobierno aki ta pa evita di duna cuenta, evita di wordo cuestiona, y actua manera un doño di tera en bes di un sirbidor di pueblo.

Na mi opinion e silencio di Gobierno ta papia mas cu nan palabranan. Ta un berguensa con ta trata nos leynan, nos institucionnan y nos futuro. Esaki ta inaceptabel! Nos no por y nos no mester sigui permiti pa e proceso aki

sigui cana den scuridad, violando nos constitucion y ignorando e bos di esnan cu berdad ta stima e pais aki. E forma di goberna aki mester stop awe mes. Henter pueblo di Aruba

mester lanta y condena e actituda di Gobierno. Tur esaki ta sosodiendo den e celebracion di 40 aña di nos Status Aparte. Mirando e rumbo....ta kico tin di celebra?

Clasificados

SOLODIPUEBLO@GMAIL.COM

CEL.585 9500

“NO TIN MOTIBO PA PERDE MAS AUTONOMIA FINANCIERO” – PARLAMENTARIO XIOMARA MADURO

Parlamentario Xiomara Maduro, como ex-Minister di Finansa, ta enfatisa cu no tin ningun motibo pa Aruba perde mas autonomia financiero pa medio di introduccion di Rijkswet HOFA.

Aruba ya caba tin supervision financiero desde aña 2015. E sistema aki a wordo establece pa fortalece disciplina fiscal y supervision riba e finansa publico di Aruba. Den e ultimo añanan, e mecanismonan di control existente a muestra cu nan ta funciona y cu Aruba por maneha su finansa publico cu responsabilidad.

“Nos mester pone e discusion den e contexto corecto,” Maduro a declara. “Aruba ya ta bou di supervision financiero. E pregunta real no ta si

supervision ta necesario, sino si nos mester cambia e sistema actual pa duna Hulanda mas influencia riba decisionnan financiero di Aruba.”

Maduro ta señala cu e resultado financiero reciente ta muestra progreso cla: disciplina fiscal a wordo fortalece, e debe publico ta wordo maneha cu responsabilidad y tin mas atencion pa crea espacio fiscal pa inversion den economia y bienestar social.

Segun e parlamentario, introduci Rijkswet HOFA no ta necesario si e sistema actual ya ta produci resultado. Al contrario, un cambio di e naturalesa aki por resulta den un estructura unda e Parlamento di Hulanda por haya mas influencia riba e finansa



publico di Aruba, algo cu por afecta e autonomia di Parlamento di Aruba.

“Si un sistema ta funciona, no tin motibo pa reemplasa esaki cu un modelo cu ta move mas poder for di Aruba. No tin motibo pa perde mas autonomia,” Maduro ta enfatisa.

Maduro ta subraya cu autonomia constitucional di Aruba, manera stipula den e Statuut pa e Reino di Hulanda, mester wordo respeta. Cada pais den Reino tin responsabilidad primario pa su propio asunto interno, incluyendo su maneho financiero.

Parlamentario Maduro ta haci un yamada pa un discusion serio y balansa riba e futuro di supervision financiero, cu e interes di Aruba y respet pa su autonomia institucional den centro di e debate.

PROME DIA DI TRABAO DI MINISTER SCHWENGLE

Den Haag – Despues cu Minister Plenipotenciario mr. Mildred Schwengle a yega Hulanda, awe riba su prome dia di trabao ela keda ricibi pa e personal di Gabinete di Aruba na entrada di e oficina. Hefe di e departamento huridico di Gabinete di Aruba mr. Shandra John a haci entrega den nomber di e personal un bouquet di

flor na minister Schwengle. Despues e mandatario a cera conoci cu e resto di e personal.

Mas laat den e dia Minister Schwengle a atende su prome reunion di Consejo di Minister di Reino (RMR). Na final di e RMR tabata tin un momento cu e tres Ministernan Plenipotenciario a pose

hunto riba potret. Na e ocasion aki mescos cu tabata e caso di Aruba, pa e Minister Plenipotenciario di Curaçao Errold Bishop tambe tabata su prome reunion di RMR.

Nota pa redaccion: E potretnan ta cortesía di Gabinete di Aruba



FORTALEZA PA FAMILIA

Scirbi pa Pastor Marcel Balootje.

ASERCA E TRONO DI GRACIA CU CONFIANSAS



Palabra di Dios ta bisa nos: Lo bo warda den pas perfecto, esun cu su pensamiento ta permanece den Bo, pasobra e ta confia den Bo. Confia den Senjor pa semper, pasobra den Dios e Senjor nos tin un Baranca eterno.(Isaias 26:3-4).

Confia den Dios, ta e parti mas importante di nos Fe, pasobra sin confiansa no tin speransa, sin confiansa ta nifica cu nos no ta kere den Dios su poder, pasobra Su misericordia ta grandi pa cu nos, y su amor ta eterno pa nos, Dios nunca ta bandona Su yuinan.

Pesey laga nos aserca e trono di gracia cu confiansa,pa nos ricibi misericordia y hanja gracia pa yuda den tempo di necesidad.(Hebreonan 4:16).

Esaki ta nos garantia, cu den kico cu nos por ta pasando aden, si nos aserca e trono di gracia di Dios cu confiansa, sin duda, cu fe , nos lo wordo bendiciona, pasobra Dios semper lo bendiciona y yuda esun cu tin confiansa den dj'E, no lubida kico Dios a haci pa Sadrac, Mesac, y Abednego den e forno di candela cayente, cayente, y kico Dios a haci pa Daniel den cueba di leon.No tin situacion difcil cu Dios no por saca bo for di dje.

Pasobra e gracia di Dios aparece, treciendo salvacion na tur hende, sinjando nos pa renuncia impiedad,y deseonan mundano,y pa biba huicioso, husto y santo den

e siglo presente.wardando riba e speransa bendiciona y e aparicion di e gloria di nos gran Dios,y Salvador Cristo Hesus. Kende a duna Su mes pa nos,pa e por redimi nos di tur inikidad,y purifica pa Su mes un pueblo peculiar, cu zelo den hacimento di bon obra.(Tito 2:11-14).

Isaias 43:25 ta splica nos cu pa gracia nos ta pordona bisando: Ami si Ami, ta Esun cu ta kita tur bo transgreshonnan pa Mi mes causa,y lo Mi no corda bo picanan.

Efesionan 2:8-9 ta corda nos cu ta pa gracia nos ta salba bisando: Pasobra pa medio di gracia boso a wordo salba door di Fe,y esey no ta di boso mes, e ta e don di Dios, no como resultado di obranan pa ningun hende no broma. Den un palabra bisa ningun hende no por haci nada pa nan wordo salba.

Nos ta wordo sostiene door di Su gracia: Pasobra ta Dios ta Esun cu ta obra den boso, tanto pa kier como pa haci segun Su bon boluntad.(Filipensenan 2:13).

Nos ta cura door di Su Gracia: Salmo 147:3 ta bisa e ta cura esnan di curason kibra,y ta mara na heridananan.

Nos ta wordo transforma pa medio di Su gracia, Romanonan 12;2 ta bisa: Y no sea conforme e mundo aki,ma sea transforma pa medio di e renobamento di boso mente, pa boso por comproba,kico ta e bon,y agradabel y perfecto

boluntad di Dios.

Su gracia ta warda nos di trompica: Awor na Esun cu ta poderoso pa warda boso di trompica, y pa haci boso para,sin culpa den e presencia di Su gloria cu gran alegria. Na e unico Dios nos Salvador, pa medio di hesus Cristo nos Senjor,sea gloria, mahestad , dominio, y autoridad, prome cu tur tempo y awor pa semper. Amen (Judas 1:24-25).


Boso anto stimanan, sabiendo esaki di antemano,tene cuidao pa boso no wordo lastra hiba pa medio di e error di hombernan malbado, y boso cay for di boso firmesa. Ma crece den

e gracia y conocimiento di nos Senjor y Salvador Hesus Cristo. Na e sea e gloria, di awor te na eternidad.(2 Pedro 3:17-18). Pa medio di Su gracia, nos ta sirbi otro.

CROSSWORD WORD SEARCH PUZZLE



WINTER CROSSWORD



ACROSS

- 2) Frozen spike
- 7) Winter sculpture
- 8) Present day?
- 14) Winter coasting
- 15) Hearth
- 16) Rudolph and teammates
- 17) Winter ____ Games

DOWN

- 1) White Rabbit's milieu
- 3) Hot chocolate
- 4) Winter outerwear
- 5) Icy coating
- 6) Rink dancing
- 7) Neck wrap
- 9) Snow remover
- 10) Aspen activity
- 11) Small shake
- 12) Stanley Cup sport
- 13) Uncomfortably cool

EXITOSO POLITIEK CAFE ORGANISA PA GABINETE DI ARUBA



Den Haag – Gabinete di Minister Plenipotenciario di Aruba a organisa na De Haagsche Bier Kluis na Den Haag un “Politiek Café” den cuadro di e Gemeenteraadsverkiezingen di dia 18 di maart benidero, Pa e evento aki a participa dos candidato Arubiano, cu ta Vanessa Bruin pa Leefbaar Rotterdam y Zane de Ponte pa D66 Den Haag. Tambe e edicion di e “Politiek Café” aki a conta cu dos orador no politico cu ta James van der Linde riba e tereno di enseñansa y Lionel Martijn, presidente di OCAN.

Despues cu e moderador di e Politiek Café Sidney Kock a yama tur presente bon bini, Hefe di e departamento Huridico di Gabinete di Aruba mr. Shandra John a hiba palabra unda ela bisa cu pa Gabinete di Aruba ta importante pa duna informacion na e comunidad Arubiano na Hulanda riba e importancia y derecho pa vota. ‘Esaki ta e razon pakico a organisa e Politiek Café aki y e biaha aki rond de Gemeenteraadsverkiezingen. Especialmente cu tin Arubiano cu ta participa na e eleccion aki y cu nos por tende mas kico e gemeenteraadnan ta haci,’ asina Shandra John a bisa. Finalmente señora John a gradici e team di Gabinete di Aruba pa e

organizacion di e evento aki.

E programa a sigi unda Sidney Kock a hiba combersacion cu e oradornan. Vanessa a papia riba con ela drenta den politica na Rotterdam; kico su trabao como “gemeenteraadslid” ta encera. Zane a bisa cu di hoben ela drenta den politica via Jonge Democraten, cu ta e ola pa politiconan hoben di D66. Den e combersacion cu James van der Linde como didactica ela papiariba democracia, implicacion y tin un bos den bo cercania directo; como ehempel Enseñansa Superior. Presidente di OCAN Lionel Martijn a splica kico OCAN ta haci pa e comunidad Caribense y tambe e nivel di participacion di e comunidad Caribense na eleccionnan compara cu e otro gruponan etnico na Hulanda.

Despues tabata tin oportunidad pa pregunta y hopi persona a haci uso di e oportunidad aki pa lansa nan preguntanan specialmente na e dos politiconan den e sala. Gabinete di Aruba por mira atras riba un evento sumamente exitoso. Un grabacion di henter e evento ta bisto riba e pagina di Facebook di Gabinete di Aruba.

Nota pa redaccion: E potretnan ta cortesía di Gabinete di Aruba



Obituario

Publica serka nos anuncio di fayecimento di bo ser keri.
Nos tin 2 pakete pa ofrese;

Pakete 1: Anuncio di fayecimento te dia cu e defunto
ser dera
Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto
ser dera
Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

**Pa mas informashon por tuma contacto cu oficina na
585-9500 of na 741-4554**



UNIDAD MOBIL NOBO DI STICHTING HUNTO LO YEGA DIRECTAMENTE NA ESNAN CU MAS MESTER




Den hopi caso, esnan cu ta lucha cu adiccion of problema di salud mental no semper ta yega na e servicio di cuido cu ta disponible. Pa algun hende, e paso pa busca yudansa ta bira un obstaculo grandi. Diaranson anochi, den presencia di Minister di Husticia mr. drs. Arthur Dowers, Minister di Salud

Publico drs. Mervin Wyatt-Ras y Minister di Relacion di Reino mr. Gerlien Croes, y un grupo grandi di invitado di sector priva y stakeholders, Stichting Hunto a presenta su unidad mobil nobo, un instrumento mas cu lo permiti profesionalnan yega directamente na personanan cu ta biba riba caya of cu ta enfrenta

problema di adiccion y salud mental. E unidad mobil lo ta presente riba diferente punto rond nos isla pa brinda asistencia basico, orientacion y direccion pa tratamiento na adictonan ambulante. E meta principal ta pa crea un brug entre e servicio di cuido cu ta existi y esnan cu, pa diferente motibo, no semper tin acceso na e servicionan aki.

E proyecto a bira realidad principalmente danki na apoyo financiero di entidadnan priva, cu a contribui pa haci posibel e compra di e Mobile Outreach Unit. E colaboracion aki ta muestra con sector priva tambe ta tuma responsabilidad pa fortalece bienestar social riba Aruba y duna un man pa cu e problema di adiccion y salud mental. Stichting Hunto ta un organisacion non-profit cu ta enfoca riba cuido mental, tratamiento di adiccion y reintegracion social. Cu e unidad mobil nobo aki, e organisacion ta amplia su capacidad pa yega na mas persona cu mester sosten. E iniciativa aki ta un



ehempel cla di con colaboracion entre sector priva y sector social por crea solucion concreto pa retonan cu comunidad ta enfrenta.

Minister Dowers ta gradici cada instancia cu a mira e importancia den sostene e causa importante aki y felicita Stichting Hunto pa e logro aki.





Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - March 09, 2026

 Sorteo # 4913 8612 2725 2907 FP  Sorteo # 4913 7078 FP  Sorteo # 2969 9285  Sorteo # 4913 7089 Tauro  Sorteo # 1787 409 FP	 Sorteo # 0 x Jackpot 0 x Match 4+ 0 x Match 4 0 x Afl. 12,00 JokerLetter Proximo Jackpot 240.000,-
 Sorteo # 0 x Jackpot 0 x Match 4 0 x Afl. 8,00 Proximo Jackpot 95.000,-	 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Mega Ball Proximo Jackpot 300.000,-
 Afl. 420.000,-	 Sorteo #
	

SER TA RISIBÍ PROMÉ RADIOGRAFIA GRANDI DI INKLUSHON DEN LUGÁ DI TRABOU

WILLEMSTAD--- 6 di mart 2026 — Konseho Sosial Ekonomiko (SER) a risibí ayera un rapòrt independiente ku ta analisá inklushon, diversidat i sentimentu di pertenensia (“belonging”) den mundu di trabou riba e isla. E estudio, ku a wordu prepará pa Report App B.V. i Optima Arbodienst B.V., ta basá riba un enkuesta online, anónimo i multilengual, ku a wordu yena pa 402 trahadónan di Kòrsou. Segun e outornan, e resultadonan ta pinta un imágen meskla. Hopi respondente ta indiká ku trato den lugá di trabou ta, por lo general, respetuoso; sin embargo, 18,7% ta bisa ku nan sa

skonde informashon personal algun biaha, pa miedu di kon otro lo reashoná. Ademas, 43,8% ta señalá ku nan ta tende ku frekuensia chiste- i/o komentarionan stereotípiko riba ekspreshon di género — un señal ku, segun e informe investigativo, ta un manifestashon subtil di eksklushon i tenshon ront di diversidat ku ta ser konsiderá normal den sierto entorno profesional. E investigadonan ta suprayá ku e estudio ta unu deskriptivo i eksploratorio: e ta buska pa pone riba mapa persepsionnan i eksperiensianan, i no tin komo meta pa establese

relashonnan di kousa i efekto. SER a risibí e rapòrt pa analisá den kuadro di su trabou di konsehá i diáloga riba asuntunan sosioekonómiko. Komo órgano tripartit, ku ta reuní representantenan di dunadonan di trabou, trahadónan i miembronan independiente, SER ta duna konseho na Gobièrnu i Parlamento riba maneho i desaroyo sosioekonómiko. E konklushonnan di e estudio por sirbi komo punto di salida pa reflekshoná mas i debatí a fondo, den kuadro di diálogo sosial, riba relashonnan laboral i kondishonnan di trabou na Kòrsou.



Parlamentario Jennifer Arends-Reyes:

“GIVE TO GAIN: ORA NOS DUNA SOSTEN, NOS TUR TA GANA”



Oranjestad (5 di maart 2026) - Den cuadro di conmemoracion di Dia Internacional di Hende

Muher, cu e tema di e aña aki “Give to Gain”, Parlamentario y lider di Fraccion AVP, Jennifer Arends-Reyes, a comparti un mensahe cla: progreso real ta logra ora nos scoge pa duna – duna oportunidad, duna sosten y duna respet – pasobra solamente asina nos tur por gana como comunidad. “‘Give to Gain’ ta recorda nos cu inversion den hende muher no ta un gasto, sino un ganashi pa henter nos pais,” Arends-Reyes a declara. “Ora nos duna mucha muher acceso na educacion, guia y oportunidad economico,

nos ta creando liderazgo, innovacion y estabilidad pa futuro di Aruba.” E parlamentario a enfatisa cu e tema di e aña aki ta invita tur sector di sociedad – gobierno, sector priva, organisacionnan social y comunidad – pa reflexiona riba kico nan por duna pa logra un ganashi colectivo. Segun sra. Arends-Reyes, esaki por inclui:

- Duna mas oportunidad di capacitacion y formacion profesional pa muchanan muher;
- Duna sosten activo na mama soltera y famianan vulnerabel;

- Duna prioridad na proteccion contra violencia domestico y abuso;
- Duna espacio pa emprendemento femenino y independencia financiero.

Arends-Reyes a subraya cu igualdad di genero no ta solamente un meta social, sino tambe un inversion strategico den desaroyo nacional. “Si nos duna confianza y recurso na nos hende muhernan, nan lo gana fortaleza y independencia. Y cu nan progreso, Aruba tambe ta gana.” El a conclui cu Dia Internacional di Hende

Muher no mester keda na palabra so, sino bira un compromiso concreto pa sigui construi un sociedad unda cada mucha muher tin oportunidad pa yega su maximo potencial. “Give to Gain ta un mentalidad. Ora nos duna cu curason habri y vision di largo plazo, nos tur ta gana – como famia, como comunidad y como nacion.”



CONFERENCIA “WOMEN IN TRANSFORMATION” A INSPIRA DIALOGO RIBA CRECEMENTO, SANACION Y LIDERAZGO



En conexión cu Dia Internacional di Hende Muhe, Ministerio di Salubridad, Asunto Social, Cuido di Adulto Mayor y Maneho di Adiccion bou di liderazgo di Minister Melvin Wyatt-Ras a organisa recientemente e conferencia “Women in Transformation” cu e tema

Grow, Heal, Lead (Crece, Sana y Lidera). E conferencia a reuni diferente profesionalnan, expertonan y lidernan di comunidad pa reflexiona riba e proceso di transformacion cu hopi hende muhe ta pasa den nan bida personal y profesional.

Durante e conferencia, participantenan a sigui presentacionnan inspirativo di Dr. Clementia Eugene, investigadora y docente na Universidad di Aruba y Antoniette Geerman, psicologo GZ y fundadora di Psyched Aruba. Den nan presentacion, nan a

comparti conocimiento y hermentnan practico riba desaroyo personal, bienestar emocional y con hende muhe por fortalece nan resiliencia mientras nan ta maneha cambio y desafio den bida.

E conferencia tambe a inclui un panel di discusion cu a explora con hende muhe por crece, sana y guia den diferente rol den sociedad. E panel a wordo modera pa Dahariana Evertsz y a inclui e siguiente panelistanan: Ali Hector, stilista profesional di vestuario; Drs. Nathalie Kingsale, psiquiatra na Respaldo Aruba; Deborah Alexander, empresario y docente na Universidad di

Aruba; y Esther Offringa, mentor y mama di atleta mundial Sara Quita Offringa.

Durante su discurso di apertura, Minister Wyatt-Ras a enfatisa cu transformacion ta un proseso continuo den bida y cu ora hende muhe tin oportunidad pa crece, sana y lidera, e impacto ta yega mas leu cu solamente un persona y ta beneficia famia, comunidad y sociedad en general.

E conferencia a crea un espacio pa dialogo, inspiracion y conexión entre participante nan, reafirmando e importancia di inverti den bienestar, desaroyo personal y liderato di hende muhe den nos comunidad.

Clasificados

SOLODIPUEBLO@GMAIL.COM
CEL. 585 9500

SOLO Di Pueblo

SOPI DI LETRANAN

ARBUSTO
BANCO
CARRETILLA
ESTANQUE
FLORES
FUENTE
INVERNADERO
MANGUERA
PALA
PARTERRE
PLANTAS
SETO
TIJERAS

Z	M	A	N	G	U	E	R	A	M	I	N	W	B
E	T	V	E	U	Q	N	A	T	S	E	Y	O	R
R	E	M	F	U	E	F	B	A	B	A	N	C	O
R	X	X	A	L	A	P	G	O	U	Q	A	D	R
E	O	R	E	D	A	N	R	E	V	N	I	E	N
T	C	A	R	R	E	T	I	L	L	A	O	C	K
R	W	J	X	W	O	S	S	E	R	O	L	F	W
A	K	V	D	S	A	T	A	T	H	W	T	Y	D
P	O	A	D	T	P	F	S	E	R	I	E	B	S
Y	O	T	N	W	U	V	Y	U	J	B	R	K	Z
P	T	A	E	E	Q	W	W	E	B	H	J	R	E
U	L	E	N	S	G	U	R	M	T	R	C	Z	R
P	A	T	Y	K	K	A	G	U	Q	Z	A	I	Z
P	E	X	B	B	S	P	T	R	C	I	G	D	V

SUDOKU

	7		6					
	9		5		3		1	7
				1				
	8						4	3
		2				6		
4	5						7	
				3				
7	4		2		5		6	
					4		2	

	3	8	5	7			9	
	6			1		5		7
	1		3		9		8	
6	9	3		4		7		
2		4			5		6	1
				8			4	9
8			4			9		
3					8	6	7	
5	7		1					4

			8		1			
						4	3	
5								
				7		8		
						1		
	2			3				
6							7	5
		3	4					
			2			6		



Oracion di dia

Un dia fructifero colma cu gracia na abundancia


El a contesta: 'Hipocritanan, profeta Isaias a describi boson bon ora cu el a bisa, manera ta skirbi: E pueblo aki, Dios ta bisa, ta alaba Mi cu nan boca so, ma den nan curason nan ta leu fo'i Mi. (Marco 7,6)

Locual ta molestia Hesus ta e hipocresia, e hipocrita ta fingi desconoce algo of fingi di ta inocente. Si tin buraco den e ley e lo uze p'asina hustifica locual e ta haci pa su cumbinencia. Esaki ta un blasfemia paso Dios bo no por gaña pero ta fingi desconoce of simplemente no ta worry. E di ocho mandamento ta bisa pa hende no lanta falso testimonio ni tampoco gaña. Nos por puntra nos mes si na tur momento nos ta consciente di esaki y nos ta haci esaki. Hopi biaha nos ta faya, haci redo of lanta falso testimonio riba otro hende, p'esaki nos lo mester reflexiona y pidi pordon, confesion ta importante pa nos haci, p'asina cambia nos bida y pa sigui biba un bida corecto den fe y cu un curason limpi di pica y di tur mal pensamiento p'asina nos no ta hipocrita y sigui riba caminda di Dios.

Oracion: Señor Hesus, duna nos e gracia di por compronde bo palabra y laga nos no wak e splinter den e wowo di otro mas bien yuda nos mira e biga den nos mes wowo. P'asina nos no gaña ni biba mane hipocritanan. Pa e motibo aki nos ta acudi na Señor, yuda nos cura nos mal accionnan cu ta aleha nos di e amor di Dios.

Amen

AUTOR JULIEN IGNACIO TA PRESENTA STORIA 'RADIO GAGA' NA PAPIAMENTO



Gaga, e ultimo storia den e buki 'Goudjakhals', ta un homenahe na su wela Arubiano cu ta di Dakota. E publicacion gratuito

'Radio Gaga' y e programa educativo rond di dje, 'Radio Gaga na Aruba', ta un produccion di Fundacion Dakota den

colaboracion cu sra. Olga Buckley, sra. Joyce Pereira, Biblioteca Nacional Aruba, Fundacion Rancho y Colegio Arubano.

Autor y especialista literario Julien Ignacio ta presenta un storia traduci na Papiamento for di su buki titula 'Goudjakhals'. Titulo di e storia ta 'Radio Gaga'. E presentacion ta tuma luga diahuebs dia 12 di maart di 7or pa 8or y mey. Un invitacion ta bay pa un y tur.

Julien Ignacio (1969) ta skirbi y publica, entre otro, storia cortico, articulo, novela y texto pa teatro. Ignacio a studia ciencia di

literatura y a traha como docente y e ta redactor na Hulanda.

'Radio Gaga' ta un storia na Papiamento cu ta wordo publica como buki, Ebook y tambe Audiobook. Alabes e ta un proyecto educativo cu ta bay scolnan local.

Ignacio ta un escritor Hulandes-Arubano. Su di dos buki Goudjakhals (2023), un coleccion di storia tocante migrante a gana dos premio. 'Radio

COPA HUBENIL GOBERNADOR FELIPE B. TROMP 2026

Inscripcion ta habri pa entrega nominacionnan pa Copa Hubenil Gobernador Felipe B. Tromp pa aña 2026.

Ultimo dia pa entrega un nominacion lo ta diaranson 8 di april 2026 na Asociacion Trabou di Hubentud na Aruba (ATHA).

Na aña 1992, e Copa Hubenil a wordo estableci oficialmente. Esaki a tuma lugar despues cu señor Felipe B. Tromp, kende a sirbi como prome Gobernador di Aruba, a pasa e responsabilidad pa su sucesor, mr. Olindo Koolman.

Felipe B. Tromp a nace na Aruba riba 15 di oktober 1917 y a fayece riba

12 di augustus 1995. Durante su bida, el a distingui su mes como un figura importante den e desaroyo social y cultural di nos isla. El a tuma parti activamente den varios iniciativa y organisacion cultural, entre nan Fundacion Centro Cultural Aruba.

E fundacion menciona tabata encarga cu e promocion y desaroyo cultural na Aruba, y pa hopi aña el a haya respaldo financiero for di Sticusa, un fondo hulandes cu a brinda apoyo durante e periodo di 1948

te 1991. For di 1984, e recurso financiero a ta wordo dirigi directamente na Aruba.

Ademas di su trabou den e campo cultural, Tromp a ocupa varios posicion den servicio publico. El a desempeña su mes como

politico,

ministro y inspector di enseñansa. Na 1986, el a marca historia como e prome Gobernador di Aruba.

Kendenan ta bini na remarca pa e copa Hubenil?

Un hoben of organisacion hubenil cu a destaca durante e ultimo aña sea riba tereno cultural, social of deportivo por wordo nomina. E edad mester ta entre 6 pa 20 aña. Y e periodo di e logronan mester ta di 15 di april 2025 pa 8 di april 2026.

E logronan por ta premionan gana, pero tambe hopi importante loke e hoben of grupo a haci na nan propio formacion manera curso, trabou comunitario, disciplina etc.

Comision ta invita tur instancia cultural, social y deportivo pa repasa e actividadnan realisa pa nos hobennan durante e periodo menciona y pa manda e nominacionnan prome cu 8 di april proximo.

E ganado(nan) lo ricibi e premio for di man di Su Excelencia Gobernador di Aruba dia 27 di april, dia di Rey.

Por entrega e nominacionnan via e link comunica ariba ATHA su pagina di Facebook: ASOCIACION TRABOU DI HUBENTUD NA ARUBA – ATHA, personalmente na ATHA situa na Caya Appeldam # 2 of via email info@athaaruba.com.

Paga bo cuenta online ta facil

Sea
Abonnement
of Aviso

Pago online,
facil y lihe

Pa hasi pago online pone number y adres na
cuenta di banco RBC Sunmax Printing
account # 7700000100152447